


U ovom broju, između ostalog, čitajte:

- **UPFBiH zahtjeva od kantonalnih vlada da riješe problema neizdavanja rješenja o samoizolaciji**
- **UPFBiH traži formiranje konsultativnog tijela za rekonstrukciju tunela Crnaja**
- **UPFBiH pozvalo delegate Doma naroda PSBiH da prihvate primjedbe UPFBiH na Zakon o sudskim taksama u postupku pred sudom BiH**
- **UPFBiH i Ministarstvo trgovine FBiH o poboljšanju poslovnog ambijenta**
- **UPFBiH traži hitne izmjene ili dodatna pojašnjenja naredbi kriznih štabova**
- **Sastanak rukovodstva UPFBiH sa rezidentnim predstavnikom MMF-a u BiH**
- **UPFBiH počelo sa realizacijom projekta „Poslovanje bez korupcije“**



## UPFBiH zahtjeva od kantonalnih vlada da riješe problema neizdavanja rješenja o samoizolaciji




Udruženje poslodavaca Federacije Bosne i Hercegovine obratilo se premijerima svih kantonalnih vlada u FBiH da riješe problema neizdavanja rješenja o samoizolaciji.


Udruženje poslodavaca FBiH ustanovilo je da sanitarni inspektori u velikom broju slučajeva ne izdaju rješenja o samoizolaciji osobama koje su pozitivne na koronavirus ili su bile u direktnom kontaktu sa zaraženim osobama, već da ih upućuju kod ljekara da im otovori redovno bolovanje, postoji u svim kantonima FBiH.

Ustanovljeno je također da je glavni uzrok tog problema nekoordinirani rad između kantonalnih zavoda za javno zdravstvo, kantonalnih inspekcija i drugih nadležnih organa.

Posljedice toga su višestruke i veoma štetne za poslodavce. Poslodavci su izloženi neopravdanom trošku plaćanja bolovanja, jer bez izdatog rješenja teret plaćanja



bolovanja snosi poslodavac, a ne država. Veliki broj otvorenih bolovanja je već zaključen i troškove bolovanja snosili su poslodavci, pa se poslodavci pitaju kako riješiti te situacije, obzirom nisu izdata rješenja koja su trebala da se izdaju, a u nekim slučajevima gdje su se izdala rješenja o samoizolaciji ne poklapaju se datum otvaranja bolovanja i datum izdavanja rješenja. Neolakšavajuća okolnosti je i činjenica da su se osobe kojima sanitarna inspekcija nije naložila samoizolaciju, nego su bili na običnom bolovanju, mogle neometano kretati i dolaziti u kontakt sa nezaraženim osobama, što je moglo utjecati na pogoršanje epidemiološke situacije i porasta broja zaraženih osoba u cijeloj FBiH.




Udruženje je podsjetilo na neophodnost dosljedne primjene zakonskih odredaba koje propisuju samoizolaciju, izdavanje rješenja, kao i prava osiguranika u slučaju privremene spriječenosti za rad, ako su izolovani kao kliconoše ili zbog pojave zaraze u njihovoj okolini. S tim u vezi, podsjetit ćemo na članove 42., 55. i 57. Zakona o zdravstvenom osiguranju ("Službene novine FBiH", broj: 30/97, 7/02, 70/08, 48/11 i 36/19), te članove 47., 48. i 57. Zakona o zaštiti stanovništva od zaraznih bolesti ("Službene novine FBiH", broj: 29/05).

U skladu sa članom 55. Zakona o zdravstvenom osiguranju i članovima 47., 48. i 57. Zakona o zaštiti stanovništva od zaraznih bolesti osoba kod koje se pojave simptomi javlja se izabranom doktoru medicine primarne zdravstvene zaštite, koji u tom momentu otvara protokol za pacijenta, te na osnovu simptoma upućuje osobu na testiranje, otvara bolovanje, te osobu šalje u izolaciju. U slučaju pozitivnog testa, osobi se izdaje rješenje o samoizolaciji.

Rješenje o samoizolaciji na osnovu pozitivnog testa izdaje kantonalno ministarstvo zdravstva, na osnovu nalaza kantonalnog zavoda za javno zdravstvo. Rješenje se izdaje za osobu koja ima pozitivan nalaz i njenim bliskim članovima domaćinstva, bez obzira da li su pozitivni, ili ne.

Kantonalni sanitarni inspektori u provedbi nadzora nad provedbom mjera za zaštitu stanovništva od zaraznih bolesti donose rješenja o zabrani kretanja isključivo za osobe koje su bile u direktnom kontaktu sa oboljelima od COVID-a 19 ili sa osobama za koje postoji sumnja da su zaražene koronavirusom. Navedena rješenja izdaju se isključivo na osnovu epidemioloških izvještaja kantonalnih zavoda za javno zdravstvo.



Dalje, prema odredbi člana 57. Zakona o zdravstvenom osiguranju naknada plaće osiguranicima za vrijeme privremene spriječenosti za rad, ako su izolovani kao kliconoše ili zbog pojave zaraze u njihovoj okolini, isplaćuje se na teret sredstava kantonalnog

zavoda osiguranja od prvog dana korištenja prava.

Shodno navedenom, a kako ne bi došlo do podnošenja tužbi za naknadu štete od strane poslodavaca, Udruženje zahtjeva da se prvenstveno preduzmu mjere kantonalnih premijera iz svoje nadležnosti u smislu uspostavljanja saradnje između nadležnih organa kako se ovaj problem ne bi ponavljao u budućnosti, te da se Uspostavi neki način da poslodavci koji su pretrpjeli štetu retroaktivno refundiraju sredstava koja su isplaćena za bolovanje osobama kojima nije izdato rješenje o samoizolaciji, a trebalo je biti.

## UPFBiH traži hitan sastanak sa predstavnicima Vlade i JP Ceste FBiH zbog najave početka rekonstrukcije tunela Crnaja



Nakon dobijene informacije da će naredne sedmice početi rekonstrukcija tunela Crnaja, Udruženje poslodavaca Federacije Bosne i Hercegovine uputilo je zahtjev za održavanje sastanka u petak 13.11.2020. godine premijeru FBiH Fadilu Novaliću, ministru prometa i komunikacija FBiH Denisu Lasiću i direktoru JP Ceste FBiH Ljubi Pravdiću o čemu je bila postignuta saglasnost svih učesnika.

„Zatim smo obaviješteni da sesastanak odgađa zbog obilaska radova na izgradnji tunela Žaba premijera Novalića, ministra Lasića i direktora Pravdića. Neprijatno smo iznenađeni ovakvim postupanjem nadležnih, jer radove na izgradnji tunela Žaba mogu obići svakoga dana u narednoj sedmici. Očigledno da nemaju rješenja koja će osigurati neometano odvijanje saobraćaja tokom rekonstrukcije tunela Crnaja te na ovaj način žele privrednike, ali i građane ovog dijela BiH dovesti pred svršen čin", kažu u UPFBiH.

Zbog iznenadne odgode prethodno potvrđenog, iz UPFBiH upućeno je pismo sa

zahtjevom za hitan sastanak federalnom ministru prometa i komunikacija Denisu Lasiću, kojim traže hitan sastanak sa ministrom Lasićem, a o sastanku su obavijestili i premijera Fadila Novalića te predstavničke JP Ceste FBiH.

„S tim u vezi, molimo vas da kao nadležno Ministarstvo za davanje saglasnosti o obustavljanju, odnosno, ograničenju saobraćaja zbog izvođenja radova na rekonstrukciji ili održavanju ceste, ne dajete saglasnost prije nego što održite sastanak sa rukovodstvom Udruženja poslodavaca FBiH", navodi se u pismu UPFBiH.

Iz UPFBiH kažu da insistiraju na sastanku i dogovoru, zbog nesagledivih posljedica i ogromne štete za privredne subjekte u Bosni i Hercegovini koje bi prouzrokovalo ograničenje, odnosno, obustava saobraćaja na magistralnoj cesti M-17.




Šteta bi se naročito odrazila na privrednike Mostara, Jablanice, Konjica, ali i za trgovce, turističke i ugostiteljske firme i sve one čija je djelatnost vezana za promet ljudi i dobara. Za privredu BiH koja već trpi velike posljedice uzrokovane pandemijom COVID-19, ograničenje, odnosno obustava saobraćaja zbog

rekonstrukcije tunela Crnaja je dodatni udarac od kojeg će se još teže oporaviti u narednom periodu.

Također napominju da su članice UPFBiH krajnje uznemirene zbog gore navedenih razloga i da većina njih pored prijetnji tužbama za naknadu štete, najavljuju i blokadu pristupa tunelu Crnaja.

„Cilj nam je da skupa preduprijedimo ovakva dešavanja i zato predlažemo sastanak putem Zoom aplikacije u narednih nekoliko dana u periodu koji vama odgovara, a kako bismo zajednički došli do rješenja ovog problema", naglašava se u pismu upućenom ministru Lasiću.



## Rekonstrukcija tunela Crnaja - opravdana bojazan poslodavaca

Udruženje poslodavaca Federacije Bosne i Hercegovine organizovalo je 17. novembra 2020. godine zoom sastanak na temu "Poduzimanje aktivnosti na sprječavanju posljedica koji bi nastale zatvaranjem tunela Crnaja".


Na sastanku je učestvovao ministar prometa i komunikacija FBiH Denis Lasić, savjetnik premijera Vlade FBiH Gordan Čahtarević, direktor JP Ceste FBiH Ljubo Pravdić sa saradnicima, predsjednik Privredne komere FBiH Mirsad Jašarspahić, predstavnici Euro-Asfalta, Asocijacije poduzetnika Hercegovine i kompanija Bingo, Konzum, Centrotrans i Amko Komerca.

Na početku je direktor JP Ceste FBiH Ljubo Pravdić izvijestio prisutne o stanju tunela Crnaja te podsjetio da ovo preduzeće prema ugovoru ima obavezu da implementira kreditna sredstva. Izvijestio je prisutne o rezultatima simulacija koja su pokazala da bi očekivani zastoji u saobraćaju trebali trajati od sedam do trideset minuta.

Predstavnik Euro-Asfalta, izvođača radova, Jasmin Bučo, kazao je da je planom rada predviđeno da ne dođe do potpune obustave saobraćaja, osim u noćnim satima, te da radovi neće biti izvođeni tokom ljetnih mjeseci. Također je kazao da je planirano da se unutar tunela napravi umjetni tunel sa dvije funkcionalne trake.



Međutim, poslodavci su naglasili da su simulacije rađene u augustu i oktobru, odnosno u vrijeme pandemije kada je najmanje intenzivirana opća privredna aktivnost, te da ne odražavaju stvarno stanje. Izrazili su bojazan da može realno doći do odstupanja u praksi, imajući u vidu loše iskustvo od nedavne rekonstrukcije tunela Vranduk.



Naglašeno je da će poslodavci pretrpiti dodatne, značajne troškove, što u uslovima pandemije i inače skućenog poslovnog ambijenta predstavlja još jedan opterećujući namet.


Direktor Udruženja poslodavaca FBiH Mladen Pandurević naglasio je da poslodavci nisu protiv rekonstrukcije tunela, ali da se mora pronaći način kako bi posljedice po privredu usljed zastoja u saobraćajnom prometu ili korištenja alternativnih pravaca bile svedene na minimum. Također, Pandurević je istakao potrebu da se adekvatno i promptno reaguje u svim fazama rekonstrukcije tunela kako bi se na vrijeme preduprijedili mogući problemi.

Zaključeno je da će do kraja sedmice svi relevantni subjekti, učesnici sastanka, dostaviti svoje konkretne prijedloge i mišljenja, te je predloženo i redovno održavanje konsultativnih sastanaka na kojima će se razmatrati svaka faza realizacije ovog projekta.



## UPFBiH traži formiranje konsultativnog tijela za rekonstrukciju tunela Crnaja

Udruženje poslodavaca FBiH u dopisu upućenom 27. novembra od Ministarstva prometa i komunikacija FBiH ili Vlade FBiH zahtjeva formiranje konsultativnog tijela za rekonstrukciju tunela Crnaja, sastavljeno od predstavnika Federalnog ministarstva prometa i komunikacija, J.P. Ceste FBiH, kompanija izvođača radova, Udruženja poslodavaca FBiH, kompanija članica Udruženja i predstavnika MUP-a Hercegovačko-neretvanskog kantona.



Udruženje poslodavaca FBiH primilo je k znanju Informaciju o dodatnoj analizi odvijanja saobraćaja za vrijeme radova na tunelu Crnaja u kojoj se navodi da zastoji u odvijanju

saobraćaja neće biti duži od šest minuta do 15 minuta, te da će potpuna obustava saobraćaja biti u terminu od 23:30 do 04:30 časova. U informaciji se također navodi da će tokom turističke sezone biti obustavljeni svi građevinski radovi te da će se osigurati dvosmjerni saobraćaj kroz tunel.

Cilj formiranja ovog tijela jeste osiguravanje kontinuirane komunikacije i koordinisanog djelovanja između svih relevantnih subjekata, te fleksibilnosti u izvođenju građevinskih radova kako bi se zajednički i blagovremeno preduprijedili problemi koje bi se eventualno mogli pojaviti tokom izvođenja sanacionih radova na tunelu Crnaja. Koordinisanim djelovanjem i osiguravanjem fleksibilnosti prilikom svake faze izvođenja radova smanjit će se prometni zastoji kod tunela Crnaja, čime će se minimizirati negativne ekonomske posljedice po privredu i građane.

## UPFBiH traži hitne izmjene ili dodatna pojašnjenja naredbi kriznih štabova



Udruženje poslodavaca Federacije Bosne i Hercegovine podržava pridržavanje svih naredbi Federalnog i kriznih štabova kantonalnih ministarstava zdravstva s ciljem očuvanja života i zdravlja građana i sprečavanja širenja koronavirusa. Međutim, u primjeni naredbi kriznih štabova članice UPFBiH susreću se sa nizom problema, jer je značajan dio odredbi u naredbama koje se odnose na poslodavce neprovodiv, neprecizan i nejasan. To je za posljedicu imalo da različiti inspekcijski organi različito tumače naredbe.

Zbog toga, UPFBiH traži ili hitne izmjene spornih odredbi u naredbama ili dodatna uputstva s ciljem njihove provodivosti, kako bi naredbe proizvele pozitivan efekat, u smislu zaštite života i zdravlja građana.

UPFBiH je uputilo urgenciju kriznim štabovima Federalnog ministarstva zdravstva i Ministarstva zdravstva Kantona Sarajevu za hitnu izmjenu ili jasno tumačenje naredbi koje se odnose na mjere vezane za sprečavanje širenja pandemije koronavirusa,

propisanim početkom novembra, a koje su napravile pravni kaos u provedbi i primjeni.

"U naredbama ova dva krizna štaba nije jasno definirano šta je 'okupljanje osoba' i šta znači 'zatvoreni prostor' te se traži da se hitno daju tumačenje ili uputstvo za primjenu naredbe u kojem će jasno i precizno biti definirano da se okupljanjem ne smatra rad radnika u poslovnim subjektima. Na ovaj način će se spriječiti različito tumačenje od strane inspektora. Također, u praksi se javlja problem različitog tumačenja 'zatvorenog prostora', a da bi se to izbjeglo potrebno je donijeti uputstvo prema kojemu se se zatvorenim prostorom ne odnosi na radne prostorije, kancelarije, poslovni pogoni, kompanije i drugi prostori za obavljanje registrovane djelatnosti, naveli su iz UPFBiH.

U naredbama se, također, koriste pojmovi koji nemaju uporište u zakonskoj regulativi, što otvara pitanje na koga se zapravo odnose naredbe. Tako se u naredbama koriste pojmovi "pravni subjekti", "mali obrti" "gradski prevoznici" i sl. koji nisu definirani pozitivnim pravnim aktima u FBiH, saopštili su iz UPFBiH.

Iz UPFBiH predlažu i izmjenu dijela Naredbe Kriznog štaba Ministarstva zdravstva Kantona Sarajevo na način da se ne utvrđuje maksimalan broj osoba koje istovremeno mogu boraviti u zatvorenom prostoru, nego da se definira broj osoba po kvadratnom metru na način da na 10m<sup>2</sup> može biti jedna osoba.

Iz UPFBiH naglašavaju da cilj urgencije nije pronalaženje načina da se izbjegava primjena naredbi kriznih štabova.

Naprotiv, iz UPFBiH želi kvalitetne propise koje će imati pozitivan efekat u smislu čuvanja života i zdravlja građana, a pri tome neće uzrokovati štetu poslovnim subjektima.



## UPFBiH i Ministarstvo trgovine FBiH o poboljšanju poslovnog ambijenta

Predstavnici Udruženja poslodavaca FBiH i Ministarstva trgovine FBiH održali su 12. novembra 2020. godine sastanak na kojem su razgovarali o stanju na tržištu BiH sa aspekta uloge i nadležnosti Ministarstva trgovine FBiH, kako bi se iznašla rješenja za poboljšanje poslovnog ambijenta. Sastanku su prisustvovali predstavnici veletrovinara u BiH, članica UPFBiH.

Poslodavci su naveli da postoje određene zakonske odredbe koja ograničavaju konkurentnost trgovačkih lanaca u FBiH, kao što su Zakon o trgovini i Zakon o zaštiti potrošača. Pomoćnica ministra za unutrašnju trgovinu i zaštitu potrošača Amra Vučijak naglasila je da je u planu donošenje novog Zakona o trgovini FBiH i Zakona o zaštiti potrošača na nivou BiH koja su od velikog značaja za poslovanje veletrovinara, te da će Ministarstvo dostaviti prijedloge zakona Udruženju s ciljem kreiranja što kvalitetnijih zakonskih rješenja.



Direktor UPFBiH Mladen Pandurević naveo je da je neophodno napore usmjeriti ka uređenju poslovnog ambijenta koji je nepovoljan, te da poslodavci očekuju od Ministarstva da rješava pitanja koja nisu u direktnoj nadležnosti tog ministarstva, ali se programski prožimaju u okviru različitih nivoa nadležnosti. Ovo se prvenstveno odnosi

na uređenje pitanja rada nedjeljom, rekonstrukcija tunela Crnaje i odredbe Kriznog štaba o ograničenju broja osoba u zatvorenom prostoru koje utiču na rad trgovina, a koje nisu žarište zaraze.



Nadalje, poslodavci očekuju od Ministra trgovine FBiH, po pitanju Zakona o zaštiti potrošača, da inicira sastanak sa ministrom Košarcem i ministricom trgovine i turizma RS kako bi se riješile odredbe Zakona koje su u koliziji sa određenim brojem odredbi entitetskih zakona, prvenstveno u Federaciji BiH.

Vučjak je kazala da se ministarstvo oglasilo na zastupničku inicijativu da se zabrani rad nedjeljom koja je upućena prema Vladi FBiH, odbivši takvu inicijativu, te ostavljajući slobodu poduzetnicima da organizuju radno vrijeme u skladu sa svojim potrebama. Navela je da će Ministarstvo tražiti sastanak sa Kriznim štabom na kojem će se tražiti pojašnjenje i izmjena odluke u smislu da ista ne važi za trgovce i proizvodne pogone.

Iskazana je spremnost za nastavak saradnje, te je zaključeno da će Udruženje dostaviti inicijative za poboljšanje poslovnog ambijenta, koje su pomenute na sastanku i one koje nisu, kako bi se što prije krenulo u rješavanje otvorenih pitanja.

## UPFBiH pozvalo delegate Doma naroda PSBiH da prihvate primjedbe UPFBiH na Zakon o sudskim taksama u postupku pred sudom BiH



Udruženje poslodavaca dostavilo je predsjedavajućem i zamjenicima predsjedavajućeg Doma naroda PSBiH, kao i klubovima naroda u tom domu primjedbe u formi amandmana na Zakon o izmjenama i dopuni Zakona o sudskim taksama u postupku pred sudom BiH. Primjedbe su dostavljene i Komisij za finansiranje i budžet


Doma naroda i Zajedničkoj komisiji za ekonomske reforme i razvoj.

Udruženje podržava donošenje pomenutog zakona kojim se stvaraju uvjeti za uspostavljanje efikasnog mehanizma naplate sudskih taksi. Međutim, u predloženom Zakonu nisu se mijenjale taksene tarife i cijene su ostale iste. Stoga je Udruženje pozvalo delegate da ne usvajaju Zakon u predloženom obliku i da u skladu sa nadležnostima preuzmu amandmane Udruženja, kako bi se Zakon izmijenio i u dijelu taksenih tarifa.

Na taj način ispunit će se ciljevi iz Reformske agende za period 2015-2018., gdje se vlast obavezala da će reforme poslovnog okruženja u BiH između ostalog uključiti i obavezu sačinjavanja i objave sveobuhvatnog popisa parafiskalnih nameta u cilju osiguravanja njihove transparentnosti i smanjenja u skladu sa podjelom nadležnosti. Također, u Pismu namjere MMF-u, od 30.06.2016. godine, obavezuje se Vijeće ministara da razradi planove s ciljem smanjenja parafiskalnih nameta. Prošlo je četiri godine, a ništa nije učinjeno po pitanju smanjenja i ukidanja parafiskalnih nameta.

Ukoliko se u tekst Zakona ugrade amandmani UPFBiH visina sudskih taksi uskladit će se sa ekonomskom snagom BiH, te će se ispoštovati načelo utvrđeno prema teoriji javnih finansija. Primjedbe UPFBiH možete pročitati [OVDJE](#).

## UPFBiH i IFC o Prijedlogu zakona o stečaju



Direktor Udruženja poslodavaca FBiH održao je sastanak sa šeficom Kancelarije Međunarodne finansijske korporacije (IFC) u BiH Ladom Buševac na kojem su razgovarali o tekstu Zakonu o stečaju koje je predložilo Udruženje. Sastanak je održan 24. novembra 2020. godine, a prisustvovali su mu i sekretar UPFBiH Mersiha Jusić i Marijana Galonja iz IFC-a.

Udruženje poslodavaca FBiH je sredinom tekuće godine predstavilo set mjera za saniranje ekonomskih posljedica pandemije koronavirusa, a koji podrazumijeva kratkoročne, srednjoročne i drugoročne mjere. Jedna od mjera Udruženja obuhvata i Nacrt zakona o stečaju Federacije BiH, koji je dostavljen Vladi FBiH, Federalnom ministarstvu pravde te Ekonomsko-socijalnom vijeću Federacije BiH.

U prijedlogu UPFBiH nisu mijenjane odredbe koje se tiču prava radnika. U odnosu na postojeći zakon, prijedlogom se uvodi predstečajni postupak, koji ima za cilj finansijsko i operativno restrukturiranje privrednih subjekata. Dalje se decidno navode lica koja su dužna pokrenuti stečajni postupak, a proširen je i krug osoba koje imaju pravo pokrenuti predstečajni i stečajni postupak. Preciziran je rok u kojem se mora pokrenuti

stečajni postupak ukoliko su ispunjeni svi zakonski uslovi, a definiran je i maksimalni rok za okončanje stečajnog postupka, kao i uvođenje sankcija zbog propuštanja rokova. Skraćeni su rokovi za poduzimanje pojedinih radnji u postupku. Također je ograničen broj stečajnih predmeta koje može voditi jedan stečajni upravnik na dva, a u složenim slučajevima na četiri predmeta te povećan stepen kontrole rada stečajnog upravnika na način da se uvodi obaveza podnošenja mjesečnog izvještaja stečajnom sudiji i odboru povjerenika. Definirana je odgovornost svih učesnika u stečajnom postupku za štetu koju prouzrokuju svojim nesavjesnim radom, namjerno ili iz krajnje nepažnje, a utvrđene su i sankcije za učesnike stečajnog postupka ukoliko kasne u provedbi potrebnih radnji, jer je u praksi kao slabost stečajnog postupka uočena njegova dužina trajanja, koja sa jedne strane povećava troškove, a s druge odugovlači namirenje povjerenika.

Zaključeno je da će IFC organizovati sastanak sa predstavnicima Ministarstva pravde FBiH i Udruženja poslodavaca FBiH na kojem će se pokušati iznaći zajednička rješenja o pitanjima koja predstavljaju razlike u tekstovima zakona predloženih od strane Udruženja i Ministarstva pravde.

## **UPFBiH uputilo primjedbe i komentare na Nacrt uredbe o metodologiji utvrđivanja najniže osnovne cijene vodnih usluga u FBiH**



Udruženje poslodavaca FBiH uputilo je Federalnom ministarstvu poljoprivrede, vodoprivrede i šumarstva primjedbe i komentare na Nacrt Uredbe o metodologiji utvrđivanja najniže osnovne cijene vodnih usluga u Federaciji BiH, jer je uočeno da se pojedini članove trebaju izmijeniti, s ciljem boljeg razumijevanja i otklanjanja nejasnoća i problema koji se mogu pojaviti u praksi kada se započne sa primjenom Uredbe. Primjedbe Udruženja možete pročitati u [dokumentu](#).



## Sastanak rukovodstva UPFBiH sa rezidentnim predstavnikom MMF-a u BiH



Fiskalni zakoni, Prijedlog zakona o stečaju i Garantni fond bile su teme sastanka koji su predsjednik i direktor UPFBiH Adnan Smailbegović i Mladen Panudrević održali 20. novembra 2020. godine sa rezidentnim predstavnikom MMF-a u BiH Andrewom Jewellom.

Poslodavci ističu da permanentno traže brzo sistemsko djelovanje na sprečavanju daljeg pada ekonomije i očuvanja radnih mjesta. Stav poslodavaca je da jedan od uslova za dobijanje novog aranžmana od Međunarodnog monetarnog fonda treba biti smanjenje opterećenja cijene rada i doprinosa u FBiH, za koje je poznato da je najveće u Europi.

Poslodavci su podsjetili rezidentnog predstavnika da je Udruženje pripremilo set mjera za saniranje ekonomskih posljedica pandemije koronavirusa koji podrazumijeva kratkoročne, srednjoročne i drugoročne mjere. Jedna od navedenih mjera Udruženja obuhvata i Prijedlog zakona o stečaju Federacije BiH, koji je već dostavljen Vladi FBiH, Federalnom ministarstvu pravde te Ekonomsko-socijalnom vijeću Federacije BiH. Na sastanku su predstavnici UPFBiH pojasnili razloge izrade tog dokumenta budući da je Ministarstvo pravde FBiH već uputilo u parlamentarnu proceduru prijedlog teksta tog zakona na čiji tekst je Udruženje imalo ozbiljnih primjedbi.


Diskusija na temu Garantnog fonda bila je usmjerena, prije svega, na iznalaženje mogućih raspoloživih načina kako bi ta sredstva bila što atraktivnija za korištenje. Dogovoreno je da će Udruženje poslodavaca dostaviti rezidentnom predstavniku MMF-a na razmatranje svoje navedene stavove i prijedloge.

## UPFBiH počelo sa realizacijom projekta „Poslovanje bez korupcije“



Udruženje poslodavaca Federacije BiH provodi projekt "Poslovanje bez korupcije" koji se realizira u okviru krovnog projekta „Podrška građanima u borbi protiv korupcije“, a koji provode Centri civilnih inicijativa (CCI), kao glavni implementator te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID).

Cilj projekta je doprinijeti smanjenju prostora za koruptivne radnje nosilaca izvršne i zakonodavne vlasti, kao i izloženosti poslodavaca korupciji. Na taj način bi se stvorili preduslovi za fer tržišnu utakmicu i poboljšanje poslovnog ambijenta u BiH, kroz iniciranje izmjene postojeće legislative koja potiče korupciju, uspostavu javnih registara, uspostavljanje web platforme za prijavu korupcije i besplatnu pravnu pomoć, te pružanje svih neophodnih informacija poslodavcima. Također će biti organizirana javna kampanja kojom će se, na osnovu prijave koruptivnih radnji s kojima se poslodavci susreću, vršiti javni pritisak na rješavanje prijavljenih slučajeva korupcije i pozvati na odgovornost institucije i pojedince odgovorne za rješavanje konkretnog problema.



„UPFBiH je preliminarnom analizom zaključilo da je potrebno pristupiti izradi teksta Zakona o jedinstvenom postupku izvođenja inspekcijskog nadzora te je identificiralo još osam zakona koje je potrebno izmijeniti i dopuniti, kako bi se preciznije zakonski regulisao rad svih nivoa inspekcija, ograničilo diskreciono pravo inspektora te time smanjio prostor za koruptivne radnje", kažu u UPFBiH.

Pored rada na izradi nove i izmjeni postojeće zakonske regulative, u okviru projekta bi se trebale održati i tematske sjednice Parlamenta FBiH, Vlade FBiH i Ekonomsko-socijalnog vijeća za teritorij FBiH o temi borbe protiv korupcije. Također je planirano kreiranje web platforme „Poslovanje bez korupcije" putem koje će se pružiti mogućnost anonimne prijave korupcije, pružanje besplatne pravne pomoći članicama UPFBiH u vezi s borbom protiv korupcije, pregled svih propisa koji se odnose na borbu protiv korupcije, bazu podataka, edukativne materijale i mogućnost interne komunikacije članova. Osim toga bit će inicirana uspostava Centralnog registra grantova, poticaja i povoljnih kredita te Centralnog registra vlasnika kapitala, kao i formiranje savjetodavnog tijela za borbu protiv korupcije čiji članovi će biti predstavnici poslodavaca, nadležnih državnih institucija, inspekcijskih organa, akademske zajednice i nevladnih organizacija.

Dosadašnje antikoruptivne aktivnosti su nepravedno izostavile uključivanje poslovne zajednice koje su često u interakciji s javnim sektorom, a koja je ujedno najveća žrtva korupcije. Stepem učesća poslodavaca u borbi protiv korupcije se mora značajno povećati, jer postoje velike mogućnosti za njegovo unapređenje kako bi se ojačao integritet privatnog sektora, obezbijedila sigurnost poslovanja i smanjili sistemski rizici, što će u konačnici voditi ka prijeko potrebnoj većoj stopi ekonomskog rasta BiH. UPFBiH broji više od 20.000 članica i ima informacije s terena o korupciji s kojom se poslodavci svakodnevno susreću, zasigurno posjeduje veliki potencijal da otvori veliki sistemski front u borbi protiv korupcije i doprinese njenom značajnom smanjenju.

## UPFBiH traži zaključivanje bilateralnih međunarodnih ugovora za povrat PDV-a

Udruženje poslodavaca FBiH uputilo je Vijeću ministara BiH inicijativu za zaključivanje bilateralnih međunarodnih ugovora.



Naime, objavljivanjem izmjena i dopuna Pravilnika o primjeni Zakona o porezu na dodatu vrijednost (Službeni glasnik BiH 44/20 od 24.07.2020.) stvoren je pravni osnov za povrat PDV-a iz država koje traže uzajamnost, odnosno za zaključivanje bilateralnih međunarodnih ugovora sa tim državama.

Prioritetne države s kojima treba zaključiti ugovor, a koje imaju uslov uzajamnosti i ne vraćaju PDV bh. kompanijama su: Hrvatska, Slovenija, Italija, Mađarska i Poljska. Hrvatska je još 2011. godine Bosni i Hercegovini uputila pismo namjere za potpisivanje sporazuma kojim bi se omogućio povrat PDV-a, međutim, potpisivanje sporazuma nije bilo moguće dok se ne usvoje izmjene i dopune Pravilnika. Također, bilateralne ugovor treba potpisati i sa: Češkom, Grčkom, Bugarskom, Rumunijom, Španijom i Švicarskom.

Na osnovu izvršenih analiza Udruženje je ustanovilo da bi iznos PDV-a koji bi se vratio domaćim privrednicima iz zemalja sa kojima se uspostavi uzajamnost bio šest puta veći od iznosa PDV-a koji bi se iz našeg budžeta vraćao privrednicima iz drugih zemalja. Dakle, budžetima se ne bi naštetilo, naprotiv, povrat PDV-a ujedno bi značio i povećanje konkurentnosti bh. privrede, a to bi se na posredan način efektuiralo na povećanje budžetskih prihoda BiH. Ukoliko se omogući povrat PDV-a bh. kompanijama taj novac će se ponovo uložiti u BiH, odnosno u nova poslovanja i razvoj privrede, a to ujedno znači i punjenje budžeta.

## Udruženje uputilo USAID-u poziv na sastanak kako bi razgovarali o trenutnoj ekonomskoj situaciji u BiH



Trenutna ekonomska situacija u BiH, poslovni ambijent i mjere Udruženja poslodavaca FBiH za saniranje ekonomskih posljedica pandemije koronavirusa bile bi teme sastanka koji je zatražilo Udruženje sa direktoricom USAID-a Nancy J. Eslick.

Na sastanku bi se također razgovaralo o podršci aktivnostima Udruženja poslodavaca, odnosno, medijskoj kampanji za zagovaranje usvajanja određenih zakona za unaprijeđenje poslovnog ambijenta i osnivanju Edukacionog centra UP FBiH.


## Potpisan ugovor sa Federalnim zavodom za zapošljavanje

Udruženje poslodavaca FBiH i Federalni zavod za zapošljavanje potpisali su ugovor kojim se reguliše prava i obaveza ugovornih strana radi provedbe projekta sufinansiranja obuke četrdeset osoba sa evidencije nezaposlenih u trajanju od tri mjeseca.

Kroz potrebe konkretnog poslodavca, ali i za otvoreno tržište rada, potiče se rješavanje problema prilagođavanja radne snage i zadovoljavanje stvarnih potreba tržišta rada.

Program ima cilj povećanje zapošljivosti nezaposlenih osoba kroz obuku kod poznatog poslodavca i obezbjeđenje prilike za zapošljavanje.

## Sastanak predstavnika UPFBiH i UIO



Predsjednik i direktor UPFBiH Adnan Smailbegović i Mladen Pandurević održali su 11. novembra 2020. godine sastanak sa predstavnicima Uprave za indirektno oporezivanje, odnosno šeficom Odsjeka za carinske postupke Miljkom Kutić i stručnim savjetnikom u tom odsjeku Milenom Davidović. Sastanku je prisustvovao i potpredsjednik Unije udruženja poslodavaca RS Janko Petrović.

Prethodno je Udruženje uputilo Upravi za indirektno oporezivanje BiH inicijativu za donošenje Uputstva o dopuni uputstva o pojednostavljenom carinskom postupku, gdje se traži da se na listu roba za koje se može odobriti pojednostavljeni postupak po fakturi doda i roba iz tarifnih oznaka 9401. Pojednostavljeni postupak bi u velikoj mjeri olakšao poslovanje kompanijama, ubrzao protoka roba, smanjili bi se troškovi, a rasteretile carinske procedure.

Iz Uprave je na sastanku rečeno da je primjena Odluke o provođenju Zakona o carinskoj politici u BiH predviđena za 01.07.2021. godine, te da, prema Odluci, neće više ni biti mogućnosti izvoza po pojednostavljenom postupku po fakturi. S druge strane, podsjetili su na druge pojednostavljene procedure koje poslodavci imaju i koje će i dalje važiti, kao što je lokalno (kućno) carinjenje, način na koji se podnosi zahtjev za lokalno (kućno) carinjenje, koje su njegove prednosti, i slično.

Predstavnici Uprave pozvali su poslodavce, članice UPFBiH, da u cilju otklanjanja eventualnih nejasnoća direktno se jave ovoj instituciji. Zaključeno je da se dosadašnja saradnja, ocijenjena kao korektna, u budućem periodu intenzivira i unaprijedi.



## Informacija o refundaciji isplaćene naknade plaće za vrijeme privremene spriječenost za rad u slučaju zaraze COVID-19

Pravo na naknadu plaće za vrijeme privremene spriječenosti za rad regulisano je Zakonom o zdravstvenom osiguranju (Službene novine FBiH 30/97, 7/02, 70/08, 48/11 i 36/19) i Pravilnikom o naknadi plaće za vrijeme privremene spriječenosti za rad na teret sredstava ZZO KS (Službene novine Kantona Sarajevo broj 25/20) od 02.07.2020. godine.

Prema članu 42. stav 3. Zakona o zdravstvenom osiguranju (Službene novine FBiH broj: 30/97, 7/02, 70/08, 48/11 i 36/19) osiguranici imaju pravo na naknadu plaće za vrijeme privremene spriječenosti za rad, ako su izolovani kao kliconoše ili zbog pojave zaraze u njihovoj okolini. Prema članu 57. navedenog zakona naknada plaće u vezi s korištenjem zdravstvene zaštite iz člana 42. tačka 3. ovog zakona isplaćuje se osiguraniku na teret sredstava kantonalnog zavoda osiguranja od prvog dana korištenja prava.

S druge strane, Zakonom o zaštiti stanovništva od zaraznih bolesti (Službene novine FBiH 29/05), odnosno članovima 47. 48. i 57. i 58. definirano je obavezno izdavanje rješenja u gore navedenim slučajevima i ko je nadležan za izdavanje rješenja.

U navedenom slučaju, poslodavac je u obavezi isplatiti radniku naknadu plaće, a pravo na refundaciju u visini koju priznaje Zavod, ostvaruje podnošenjem zahtjeva Zavodu zdravstvenog osiguranja Kantona Sarajevo.

Refundaciju troškova na teret sredstava kantona definiše Pravilnik o naknadi plaće za vrijeme privremene spriječenosti za rad na teret sredstava ZZO KS (Službene novine

Kantona Sarajevo 25/20) od 2.7.2020. godine. Pravilnikom se između ostalog definiše i način podnošenja zahtjeva za refundaciju i potrebna dokumentacija.

Prema članu 10. i članu 11. navedenog pravilnika:

- Zahtjev za povrat isplaćene naknade plaće za vrijeme privremene spriječenosti za rad podnosi poslodavac.
- Zahtjev se podnosi u poslovnicu Zavoda prema mjestu sjedišta poslodavca, za poslodavce koji imaju sjedište na području Kantona Sarajevo. Poslodavci koji nemaju sjedište na području Kantona Sarajevo, zahtjev podnose prema sjedištu poslovne jedinice ili prema mjestu prebivališta osiguranika.

Uz zahtjev za povrat naknade plaće, podnosilac je obavezan priložiti sljedeću dokumentaciju:

- izvještaj o privremenoj spriječenosti za rad izabranog ovlaštenog doktora medicine primarne zdravstvene zaštite o privremenoj spriječenosti za rad;
- Obrazac NPL-1 popunjen u tri primjerka (obrazac se preuzima u Zavodu gdje se predaje zahtjev)
- Obrazac ZO-PL – Potvrda o isplaćenoj neto plati u koju se u određene rubrike unose podaci neto plaća za mjesec koji je prethodio utvrđivanju privremene spriječenosti za rad, kao i za posljednjih šest mjeseci prije nastupanja privremene spriječenosti za rad, ne uzimajući u obzir mjesec koji prethodi mjesecu u kome je nastupila privremena spriječenost za rad osiguranika (uz priložene potvrde o plaći ili ovjerene platne liste za mjesec za koje se unose podaci); - obrazac se preuzima u Zavodu
- dokaz da se privremeno ne obavlja samostalna djelatnost za vrijeme trajanja privremene spriječenosti za rad (za samostalnog djelatnika koji nema drugih zaposlenih niti prijavljen osiguranika); - nije potrebno za poslodavce
- rješenje o izolaciji nadležnog organa za lica izolovana kao kliconoše ili zbog pojave zaraze u njihovoj okolini. U izuzetnim okolnostima, umjesto rješenja ukoliko isto nije izdato, može se prihvatiti drugi akt iz kojeg nesumnjivo proizlazi da su ostvareni uslovi obavezne izolacije (obavijest nadležnog organa i slično). -Rješenje oboljelima od COVID




-a 19, kao i najužim članovima njihovih porodica, koji imaju istu adresu prebivališta izdaje Ministarstvo zdravstva KS;

Rješenja o zabrani kretanja isključivo za osobe koje su bile u direktnom kontaktu sa oboljelima od COVID-a 19 ili sa osobama za koje postoji sumnja da su zaražene koronavirusom donosi Kantonalni sanitarni inspektori na osnovu člana 57. i 58. Zakona o zaštiti stanovništva od zaraznih bolesti ("Službene novine FBiH", broj: 29/05).


Pravilnik možete preuzeti [OVDJE](#).

## Šansa za zaposlenje 40 mladih i žena u drvnoj industriji



Udruženje poslodavaca Federacije Bosne i Hercegovine je započelo implementaciju projekta "Stručno osposobljavanje i zapošljavanje mladih i žena u drvnoj industriji" u okviru USAID WHAM projekta.

Cilj projekta je profesionalno osposobljavanje 40 nezaposlenih mladih i žena za pozicije tapetara i modelara koja su deficitarna u drvnj industriji, te osigurati zaposlenje kod poznatog poslodavca za minimalno 90 posto sudionika od kojih se očekuje da uspješno završe tromjesečni proces obuke.



"Obzirom da je drvena industrija u FBiH izvozno orijentisana i da bilježi konstantan rast, same kompanije često ne mogu udovoljiti narudžbama

inostranih kupaca usljed nedostatka kvalifikovanih tapetara i modelara, iako se radi o radnim mjestima koja su za 20 posto više plaćena od prosječnih plaća u sektoru. Procjenjuje se da je potražnja za ovim kadrom četiri puta veća u odnosu na broj školovanih stručnjaka. Nedostatak navedenih profila radnika onemogućava kompanije da šire svoje proizvodne kapacitete, osvajaju inostrana tržišta i otvaraju nova radna mjesta, a što će biti od koristi i široj društvenoj zajednici", naglasili su iz UPFBiH.

Udruženje poslodavaca FBiH kao nosilac projekta će organizovati teoretsku online nastavu za sve polaznike, a praktična obuka će se vršiti u pogonima kompanija koje su za to iskazale svoj interes, konkretno, to su Fen, Nobil i Woodteam koje su regionalni lideri razvoja u Tuzlanskom kantonu, Srednjobosanskom kantonu i Kantonu Sarajevo. Sve kompanije zadovoljavaju tehničko-tehnološke uslove za izvođenje praktične obuke te će osigurati sve potrebno za izvođenje praktične obuke polaznika.

## UPKS traži hitno donošenje odluke o odobrenju finansijskih sredstava za pomoć privrednim subjektima

Udruženje poslodavaca Kantona Sarajevo uputilo je predsjedavajućem Skupštine KS Mirzi Čeliku zahtjev za održavanje hitne sjednice Skupštine na kojoj će se donijeti odluka o odobrenju finansijskih sredstava za pomoć privrednim subjektima.



Udruženje je podsjetilo da su svi građani a i privredni subjekti pogođeni negativnim posljedicama, te da nema naznaka kada će ovo biti zaustavljeno.

Poslodavci očekuju od izvršne i zakonodavne vlasti pomoć u saniranju negativnih posljedica izazvanim pandemijom korona virusa. U prethodnih osam mjeseci Vlada i Skupština KS donijeli su zakonska rješenja kojim je, jednokratno, odobrena pomoć u vidu pokrića dijela minimalne plaće za uposlenike u realnom sektoru. Odobrena pomoć niti izbliza nije adekvatna razmjerama šteti izazvanoj navedenoj pandemiji.

Imajući u vidu da je Vlada KS utvrdila prijedlog za dodatnu pomoć privrednim subjektima u ovom kantonu Udruženje poslodavaca KS očekuje od zastupnika u Skupštini KS da u hitnom postupku i na vanrednoj sjednici donesu odluku o odobrenju finansijskih sredstava za pomoć privrednim subjektima koja će imati značajan efekat u zaštiti radnih mjesta i opstanak privrednih subjekata. Udruženje očekuje da zastupnici preuzmu odgovornost i daju svoj doprinos za ublažavanje negativnih posljedica po poslovanje većeg broja privrednih subjekata u Kantonu Sarajevo.

## UPKS traži hitno rješavanje problema neizdavanja rješenja o izolaciji oboljelima od Covid-19

Udruženje poslodavaca Kantona Sarajevo uputilo je premijeru Vlade KS, Ministarstvu zdravstva KS i Zavodu zdravstvenog osiguranja KS zahtjev za hitno rješavanje problema neizdavanja rješenja o izolaciji oboljelima od Covid-19. Iz UPKS ističu da se svakodnevno obraćaju brojne članice koje ukazuju da im se, nakon što ljekar utvrdi da je uposlenik pozitivan na koronavirus ili je bio u direktnom kontaktu sa zaraženim osobama, umjesto Rješenja o samoizolaciji izdatog od Kantonalne uprave za inspekcijske poslove - Inspektorata sanitarne, zdravstvene, farmaceutske i inspekcije za hranu Kantona Sarajevo, nadležni domovi zdravlja izdaju doznake za bolovanje.

Zbog neizdavanja rješenja o izolaciji i samoizolaciji, umjesto primjene člana 42. i 57. Zakona o zdravstvenom osiguranju (Službene novine FBiH 30/1997, 7/2002, 70/2008, 48/2011, 100/2014 - odluka US i 36/2018) gdje je navedeno da "troškovi bolovanja zbog preporučene izolacije i stavljanja pod zdravstveni nadzor idu na teret Zavoda zdravstvenog osiguranja", dostavljaju se redovne dokaze za bolovanje gdje teret odsustva radnika snosi poslodavac.



U uvjetima ogromnih posljedica ekonomske krize izazvane pandemijom COVID-19 koje privrednici i njihovi uposlenici u KS najdirektnije osjećaju ovo predstavlja još jedan dodatni namet na privredu. Umjesto da se nastoji olakšati poslovanje privrednim subjektima u ionako teškim uvjetima, nadležne institucije na ovaj način kreiraju nova opterećenja i parafiskalne namete koji dodatno otežavaju položaj uposlenika i poslodavaca u realnom sektoru. Stoga, iz Udruženja poslodavaca KS zahtjevaju hitno i retroaktivno poduzimanje adekvatnih mjera i rješavanje ovog problema, u cilju zaštite života i zdravlja radnika ali i pomoći posrnulim privrednim subjektima.

## Na inicijativu UPKS donesen Zakon o dopunama zakona o ublažavanju negativnih ekonomskih posljedica i uštedama u KS



U Službenim novima Kantona Sarajevo 46/20 od 19.11.2020. godine objavljen je [Zakon o dopunama Zakona o ublažavanju negativnih ekonomskih posljedica i uštedama u Kantonu Sarajevo.](#)

Dopune Zakona su donesene na inicijativu Udruženja poslodavaca Kantona Sarajevo.

Dopune Zakona odnose se na produženje mjera, odnosno na finansiranje cijele ili dijela minimalne mjesečne neto plaće na nivou FBiH za juni i juli 2020. godine djelatnostima kojima je rad znatno otežan zbog posljedica uzrokovanih pandemijom koronavirusa. Izmjene Zakona se odnose i na Kreditno-garantni fond, kao srednjoročnu mjeru podrške privrednim subjektima u Kantonu Sarajevo, kroz koji će biti odobrena povoljna finansijska sredstva za privredne subjekte.



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**